

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2021

email: sulusamoa@cccs.org.ws -Main Office: Ph. 24414, Ext 30 - website: www.ccs.org.ws

AMATA GALUEGA O LE 2021



(Iosefa A.Uilelea FT-Sui Taitaifono Fono Tele/Failautusi KAT, Asotasi Gu Time FT-Taitaifono KAT, Tunumoso S.Iosia FT-Taitaifono Fono Tele, i le Ta'utinoga A'oa'o Malua, 12/1/2021)



Malumalu EFKS Takanini, I ONA TULAGA AAO, & Le Rosa Samoa Takanini Community Hall

FAASINO UPU

- | | |
|--------------------------------------|----|
| 1. O le Lauga | 2 |
| 2. Amata Galuega EFKS o le 2021 | 3 |
| 3. Faafou Senetenari i Malua | 4 |
| 4. Osi Feagaiga EFKS Petania-fou | 4 |
| 5. EFKS Takanini, Manukau | 5 |
| 6. Na o Afioga e Tulei Mai i Fofoga | 6 |
| 7. Tatou Mea e 'Ai e Tatau ma le Aso | 8 |
| 8. O e ua fai i Lagi Folauga | 12 |

O LE LAUGA

Tusi Faitau (TFA): Mareko 1: 1 – 15

Matua: Mareko 1, *“¹⁵Ua oo mai ona po, ua latalata mai le malo o le Atua; ina salamō ia, ma faatuatua i le Tala Lelei.”*

Manatu Autu: O LĒ MUAMUAMAI.

O le amataga o le Tala Lelei, o le amataga lava lea o le galuega a Iesu Keriso i le lalolagi. A o le faamoemoe sa faataoto e le Atua i le amataga, pei ona faailoa mai mea e uiga ia Iesu Keriso mai upu a tagata. Lea ua taunuu mea na tautatala ai Perofeta – *‘O le leo o lē ua alaga i le vao, Ina teuteu ia outou le ala o le Alii; ia faasasa’o ona ala.’* O le Tala Lelei o le faaolataga mo sa Iutā i taimi o le Tafeaga, e pei ona ta’ua e Isaia. O le faanaunauga o le perofeta, se’i momoli lenei upu fou mo le faaolataga o sa Iutā, le nuu ua lailoa, se’i o latou matuā talitonu ma faatuatua, ua na o le mana o le Atua e toatasi latou te ola ai. O le Atua na te lavea’iina i latou mai o latou fili. O le Atua na te faasa’olotoina i latou mai le amo o le pologa. O le Atua na fa’aali ona ala ia Farao ma Aikupito. O le Atua o le Esoto, o le Sami ‘Ula’ula ma le malaga umi, o upu ma tautoga, o feagaiga na osi. O le nuu o le folafolaga ma tofiga. O le Atua lava lea e tasi sa latou feagai mai anamua. O le Atua e tu i matagi ‘olo mo ona tagata. O peau laga vale o le tuana’i, e aogā e fai ma falea’oga e faatonutonu ai o latou ala ma se’i toe tatā ai i le moa o le ala.

O le molimau a Mareko, o Ioane le Papatiso na sau e muamua mai e momoli mai se feau e sili ona tāua mo i tatou. O le feau o le papatisoga mo le faamagaloina o agasala. O lona uiga e ao ona tatou ta’utino ma le faamaoni lo tatou fulitua i le leaga. E toatele tagata na o mai i le talaiga a Ioane ma ua

papatisoina. E lē mailoa tonu i manatu o tagata na o atu ia Ioane po o fea o i ai o latou faamoemoe. Ia, po o a lava mafuaaga, ae ua manino ia i tatou le feau ua aumai. O mua’i teuteuga nei ma tapenapenaga o le malo o le Atua. O lona uiga o le faafitauli, o i tatou. E tatau ma onomea le malo ona tu, peitai e sili ona manaomia ona papatisoina i tatou i le salamō, e pei ona a’oa’o mai Ioane. Ma faamagaloina ai a tatou agasala. *Ina teuteu ia outou le ala o le Alii.* O le pito laau ma le sao lea o Ioane le Papatiso. Sa alaga i le vao. Atonu ai o le vao, sa aumau ai nai tagata matitiva ma le lē taualao. Ai lava o nai tagata nei sa o ane ia Ioane se’i ona papatisoina i latou. Sa ofu Ioane i le fulufulu kamela, o ana mea ‘ai o le sē akerise ma le meli vao. Ai o faailoga ia o ona lagona faaitiitia ma le loto faamaualalo. A ua ia faasili Lē o mulimuli mai. A o ia ua na o se ‘ave feau, *“⁷O loo mulimuli mai le tasi, e silisili o ia ia te a’u, ou te lē aogā a’u e punou ifo ma tatala le nonoa o ona seevae. O a’u nei, ua ou papatiso atu ia te outou i le vai; a o Ia na te papatisoina outou i le Agaga Paia”.*

Ua papatisoina Iesu e Ioane. O le Atalii e toatasi ua ave i ai le faatuatuaga a le Tamā na te tausi ma faafoe lona malo. Ina ua tula’i mai le Atalii i lana galuega, na ia tulai mai i le foe e faatautaia galuega o le malo o le Atua i le lalolagi. O lana galuega faaola, o iina na iloa tino ai le galuea’iina e le mana o le Tala Lelei loto o tagata na talitonu ma faatuatua ia Iesu. Sa tele foi ina tautala Iesu e faailoa i ta’ita’i o le Lotu Iutaia faapea ta’ita’i o le nuu, i le au faresaio ma le au tusiupu, o latou ala faapolokiki leaga ma pulega amiolētonu. O ala o le malo o le Atua, o ala o le amiotonu ma le filemu. E lē o le pelu po o le fitafita e pei ona naunau nisi. E pei ona fesili le au soo, po o afea ea? Fai mai Iesu, *“⁷E lē tusa ona outou iloa o ona po ma ona tausaga, ua tuu e le Tamā i lana lava pule.” Galu.1.* Peitai, o lea lava ua faailoa e Iesu, galuega a le malo o le Atua i le lalolagi nei. Sa fesili Ioane le Papatiso a o i ai i le fale puipui; ua tau lafoa’i auupega, ua faapea ai ua lafotūina le feau. Ua auina ona soo e to’alua, e fesili ia Iesu – Po o oe ea lē maliu mai? Fai mai Iesu, *“²²Ina o atu ia oulua, ma faailoa atu ia Ioane o mea ua oulua vaai i ai, ma faalogo i ai; ua pupula tauaso, ua savavali pipili, ua faamamāina lepela, ua logo tutuli, ua faatutūina e na oti, ua folafolaina le tala lelei i e matitiva.* ²³*E manuia foi se lē tausuai ia te a’u.”* Luka 7.

Le Ekalesia e, ua atagia galuega o le malo o le Atua i le lalolagi, ma ua galuea'iina ai lo outou faatuatua i le Atua. O le malo na te faia suiga lelei, mo le manuia o faiga malo, mo le manuia o aiga ma nuu faapea le atunuu. O le malo na te faatolaloina Satani ma ana faigamalo o nei aso. Le Ekalesia e, o le Atua le faapogai o lo tatou faamoemoe. Afai e 'au le Atua ma i tatou, o ai se a faasagatau mai? Malo le onosai ma le loto tele. O lo tatou valaauina o loo taoto i le ogātonugalēmū o puapuagā ma faigatā e tele. E leai se mea lelei e maua ma le filemu. Tatou te lē lavavā, e mā'osi'osia ma gāugāu. O ai o faasagatau ma faataumatatao mai, o fatia na e a'oa'oina ai la tatou folauga o faia pea. A o le Atua e lē faatauina lona alofa pe faatosinaina lona agalelei. E tupu pea lona alofa ma fua mai pea lona agalelei. Pe tatou te tautevateva ma fesēa'i i le ala, e lē mavae le alofa o le Atua ia te i tatou. O le satauro o Keriso le faamaoniga ma le pine faamau o lenei alofa silisili ese o le Atua. Le satauro na avea o se la'au matagā inosia ma taufaamata'u, ae ua avea nei ma faailoga o le manumalo, le olioli ma le filemu.

Ua tuana'i atu lona tausaga ma ona galuega tetele sa tatou feagai ai, e lē gata o tiute masani o le soifua ua valaauina ai, ae faapea foi faamoemoega faapitoa sa fau ao fau po, ua mafai ona faataunuuina i le alofa o le Atua. Sa lamatia foi le savaliga i lapata'iga mo loulouā o suiga o le tau, ui i lea ua na o ni galu sa faafua ae le'i fati. E silisili le taufaamata'u o le faama'i oti mata'utia o le Koviti-19 ua fano ai le miliona o le lalolagi, ae ua tatou sao mai ai. O le faama'i foi i ona tapu ma aafiaga, ua avea ai lona tausaga ua mavae, o se tausaga tulaga ese i le tala faasolopito o le Ekalesia, ina ua lē mafai ona auai mai Matagaluega i fafo i fononua Komiti, ae maise lana Fononua Tele sa lē mafai ona faataunuu i taimi e masani ai. Peita'i le alofa o le Atua, i auala o fesootaiga faaonaponei, sa mafai ai ona fa'aaauu pea le galuega. O lenei tausaga, ua amata lava foi i le vevesi o tagatanuu o le malo Samoa, mo lana faiga palota e filifili ai ona ta'ita'i. O i tatou foi o isi tagatanuu o lo tatou malo Samoa, tatou te auai i lea faiga filifiliga e tusa ma la tatou aiā tatau ai. Ae o tatou foi o tagatanuu o le malo o le Atua, e ao ona tatou faamalosi le alofa, le filemu ma le faamaoni, ae tete'e atu i faiga pi'opi'o ma amiolētonu. Ia manuia le alo faiva o le Ekalesia i ana feau o lenei tausaga. Ma ia i le Atua lona viiga e faavavau. Amene. *Saunia e IetiTofaeono FS, EFKS Sauano, Matagaluega APIA SASA'E.*

AMATA GALUEGA EFKS 2021

Na toe amata galuega masani o le tausaga 2021 i le Aso Gafua 4/1/21, i le toe a'e mai o le aufaigaluega i le Ofisa Tutotonu i Tamaligi. O le aso 5/1 na faia ai toe sauniga o se tasi o le aufaigaluega, Samata Iusitini Leiloa FS i le EFKS Grey Lynn Niu Sila (silasila i le Tala o ona Toe sauniga). O le aso 7/1 na faia ai le sauniga lotu mo le amataina o galuega o lenei tausaga. Na taitai le afioga Taitaifono Fononua Tele ma sa auai le afioga Sui Taitaifono, le Failautusi Aoa & Teutupe, ulu o matagaluega ma le ofisa atoa, i le agaga o le nō nō manū ma faatoga mamate, e tuuina atu faamoemoega uma o lenei tausaga i le taitaiga ma le faamanuia a le Atua. O Lotu Talosaga o le tausaga na amata i le Aso Toonai 2/1 ae tualuga i le Aso Faraile 8/1/21, o mataupu na saunia e le susuga Isaako Viki FT, le feagaiga EFKS Levi Saleimoa, a o le Toeaina o le Pulega Malua Sisifo.

O le Faatalatalanoaga o A'oa'o Malua sauni e a'e i lenei tausaga sa faia i le Fogafaleono o le Ioane Viliamu i le Aso Gafua 11/1, a o le Tautinoga na faia i le Maota o Tupulaga EFKS i Mulinuu i le Aso Lua 12/1, ma faasolo ai fonotaga a Tamā o le Ekalesia: Komiti Malua i le 13/1, KMTA i le 14/1. Sa mafai ona auai Susuga Toeaina o Matagaluega i Fafo i nei fonotaga, e ala i fesootaiga faainitaneti o le ZOOM. O nisi o Galuega/Fononua Faavae faagasolo: Fononua Komiti Faamisionare - Aso Faraile 15 Ianuari. Asiasiga Komiti Aoga - Aso Gafua 18 Ianuari. Fononua Komiti Aoga - Aso Lua & Aso Lulu 19-20/1. Asiasiga Komiti Atina'e - Aso Tofi 21 Ianuari. Fononua Komiti Atina'e - Aso Faraile 22 Ianuari. Asiasiga Komiti Feau Eese - Aso Gafua 25/1. Fononua KFE - Aso Lua & Aso Lulu, 26&27/1. Aso Sa Tupulaga - Aso Sa 31 Ianuari (Apia). Asiasiga Komiti Tupe - Aso Gafua 8 Fepuari. Fononua Komiti Tupe - Aso Lua & Aso Lulu 9&10/2. Fononua Komiti A'oa'oga Kerisiano - Aso Gafua 8/3. Fononua Komiti Malua - Aso Lua 9/3, KMTA - 10/3. Fononua Komiti Au Toeaina - Aso Tofi & Faraile, 11-12/3. Fononua Komiti Au Taumafai - 8 & 9 Mati 2021. Fononua Komiti Iloilo Faavae - 15 & 16 Mati 2021. O le Fononua Tele 2021 ua atofaina mo le 2 vaiaso, Aso Gafua 10 Me 2021 - Aso Faraile 21 Me 2021. O le Manatu Autu o le Fononua Tele 2021 - **O LE MALAMALAMA MOLANA EKALESA** (The Light for His Church). Ia manuia galuega o le 2021 i le ta'ita'iga, le faatasi mai ma le faamanuia a Iesu Keriso le Ao o le Ekalesia. Ma ia ia te Ia le viiga pea a faataunuuina manuia nei faamoemoega uma.

FAAFOU SENETENARI, MALUA

O se tasi o ulua'i galuega faafou o lenei tausaga 2021, o le toe atoina lea o le Maota Senetenari i Malua. O la le susuga Failautusi Aoao Vavatau Taufao FS, o le Mau lea mai le Komiti Au Toeaina (KAT 20/87) ina ia faia se galuega toe faalelei i le Fale Senetenari i Malua, e lē gata mo galuega ma fonotaga faagasolo, a o le ma'a faamanatu foi o le 100 tausaga o le Kolisi i Malua. O lana fonotaga i le aso 7 Me 2020 na pasia ai e le Komiti Feau Eseese (KFE 20/61) lenei talosaga a le Au Toeaina. Sa talosagaina e le KFE le Komiti Tupe mo se \$80,000 e amata ai le galuega a o sailia e le Komiti o Galuega le tau atoa, mo le toe atoina o le maota i 'apa fou. O le afioga Mataia Apisaloma TT (Tiakono Toeaina Faleata) le Matuaofaiva o le konakarate sa feagai ma lea galuega i le tau e \$53,000 oloa + \$27,000 leipa, ma e 4 vaiaso na faatino ai lenei galuega.

O le Fale Senetenari na ulua'i fausia i le tausaga 1944 e fai ma pine faamau o le atoa ai o le senetenari 100 tausaga talu ona faavae le Kolisi Faafaifeau i Malua i le 1844. O le afioga o Saanapu sa nafa ma lea galuega. A o le tausaga 1985 ina o avea le susuga Oka Fauolo FT ma Pule o le Kolisi Malua, na faia ai le ulua'i galuega faafou/faalelei i lenei maota. O lona galuega sa nafa lava ma A'oa'o Malua i lalo o le taitaiga a le susuga Niulala Kupa FS (EFKS Tafua-tai) a o A'oa'o tausaga 2; na suia uma ai pou, sui uma le 'afa o loo faamaumau ai laau uma i amopou, o iviivi ma 'aso, 'ave'ese le vaega o fale tā'ele, faaopopo ona tāla (faa-fale-Samoa), o lona faataumata faataamilo, ma isi vaega e pei ona i ai ona foliga lautele i nei aso. Na avea le Fale Senetenari ma Maota Fono e usuia ai le Fono Tele a le Ekalesia i nisi tausaga, ina ua faato'ateleina usufono i le faaopopo pea o Matagaluega fou, ae maise ina ua faaleleia le Malumalu Iupeli I. O le mae'a ai o le Fale fou o le Mafutaga Tina, na siitia loa i ai le Fono Tele a le Ekalesia, ma mulimuli ane ai i lona Maota Fono ina ua mae'a fausia ma tatala aloaia. O le Fale Senetenari o le maota ua molimau ma faamaonia e le toatele o le Ekalesia lona mālōlōina lelei ona o le mālū o le savili e si'osi'omia ai. Ae le'i fausia le maota mo le Au Penisione, o le Senetenari sa avea ma nofoaga sa mapu i ai nai tina e lē usufono, mo la latou tapua'iga a o alo faiva le Ekalesia i le tauaofia o lona Fono Tele. Talosia le agalelei o le Atua e aulia atu ai e lenei maota tāua, lona 100 tausaga i le 2044. Ia viia le suafa o le Atua, ua mafai ai ona faatino galuega fou faapea foi ma galuega faafou.

OSI LE FEAGAIGA EFKS PETANIA FOU

O le susuga Faauuga Matautia FT (KMTA Faleata) na ta'ita'iina le sauniga o le Osiga Feagaiga a le EFKS Petania-fou, i Toamua-uta, Pulega Faleata Sisifo, ma la latou Faifeau, susuga Enoka Pouniu FS ma le faletua ia Lila, i le Aso Lulu 3 Fepuari 2021. O Tautua Aurelio FS (Vaigaga, Failautusi Pulega) na faitauina le Tusi Paia (Mare.10:17-22), Dr. Eletise Suluvale FS (Toamua, Failautusi Mtg) na saunia Talosaga, a o Muao F. Su'a FS (Vaitele-uta) na faia le Lauga. O se Sauniga mamalu na faatumulia ai le Maota o le Galuega fou, na auai ma molimau susuga Misipalauni Faatau FT (Pulega Faleata Sasa'e), Mataia Apisaloma TT, Tamā ma Tinā Penisione, Faifeau o le Pulega ma le Matagaluega Faleata ma Itu o Tane ma le tele o isi fata faitaulaga, le vasega o Faletua, le mamalu o Aiga na lua, faapea tamalii ma failauga mai afioga o Toamua ma Auala. O le afioga ia Lemaota Kiso AF, le sui o le Aulotu na ta'ua, e le'i faigatā pe lavelave la latou filifiliga, le palota sa fulisia ma autasi i le Faifeau misionare o loo tausia le Aulotu. Na saunoa foi le susuga Enoka i le agaga faafetai, auā ua 11 tausaga ma 2 masina o faatalitali, talu ona i'u mai Malua i le 2009; 5 tausaga galulue Faifeau Nofu Aiga i Auala, 4 tausaga i Toamua, tofia e amata ma tausii faamisionare le Aulotu i Petania-fou i le aso 5 Me 2019; sa popole foi ne'i ese se faifeau e finagalo i ai le Ekalesia, peitai e faafetai i le Aulotu i ona Matafale e 12, ona o la latou faatofalaiga paia. "E lē o le fitafita, e lē o le malosii, a o lo'u Agaga..." Saka.4:6, o lana lea ta'utinoga.

O le Matua o le Lauga - Mar. 10: 21, a o le Manatu Autu - Fautuaga Lelei, o le Tala Lelei. E faavae i fautuaga lelei na fai e Iesu, mo le ta'ita'i mau'oa na fia mau le ola faavavau - na ta'u i ai e Iesu le Tala Lelei. O le faamuamua a le Faifeau, ia saunia lelei ana Lauga, e ta'u atu ai le Tala Lelei i tagata e faaolaina ai e faavavau. Sa faaopopo foi le Toeaina ta'ita'i, o le galuega faa-faifeau e si'osi'omia e faigatā faa-luko fe'ai, e mana'omia ai le lava onosa'i ma faalagolago i Lē na auina i la'ua. Sa folasia foi Toga e pine faamau ai feagaiga osi e tusa ma le aganuu, ae maise fa'aaloaloga maualuluga faa-EFKS e masani ai le soifua tautua tuavae e faaeaea i ta'ita'i ma auuina a le Atua. Tau ina faamanuia le Atua i le susuga faafeagaiga ma le faletua, ma le EFKS Petania-fou, a o latou i ai i le amataga o la latou galuega. Ma ia i le Atua lona viiga, seanoa o Ia e lē tau lau o faamoemoe.

FAAULUFALEINA O LE MALUMALU & FALE MAFUTA, EFKS TAKANINI, MANUKAU.

O le Aso Tofi, 3 Tesema 2020 sa faapa'iaina ai le Fale Mafuta (Hall) ua faaigoaina nei o - **LE ROSA SAMOA TAKANINI COMMUNITY HALL.** O le susuga Silo'a Lologa Iosua (FT), le Toeaina o lenei Pulega Manukau i Sasa'e, sa ta'ita'i le sauniga e fa'apaia ma fa'amanuia ai lenei galuega. O le falesa tuai lea o le aulotu, ua toe fausia ma fa'afouina e avea ma fale mafuta. E aofia i le galuega lenei le pakaga o ta'avale (car park), umukuka, alavai (drainage) ma isi.

E \$433,000.00NZD na tu'uina mai le NZ Lottery ma le Foundation North. O le fa'afetai fa'apitoa mo le Aoa Fesoasoani ia Afamasaga A. T. Pavihi, o le Cultural Advisor i le va o le aulotu ma fa'alapotopotoga fesoasoani tupe a le malo o Niu Sila. E \$40,000.00NZD le tau o nofoa ma laulau o le foa'i lea a le Mafutaga Tinā o le Aulotu. O le susuga Noa Ainoa sa feagai ma le fa'afouina o le galuega (renovation). Ina ua mae'a le Sauniga Lotu ma le tala o le galuega, ona soso'o ai lea ma Ta'alolo ma le Po Siva a le Aulotu.

A o le Aso To'ona'i, 5 Tesema 2020 na fa'aulufale ma fa'apa'ia ai le Mauga o le Atua, ua fa'aigoaina nei o - **IONA TULAGAAAO.** O le ta'ita'i o le Sauniga o le Susuga i le Toeaina Silo'a Iosua Lologa (FT). Sa amata mai le Sauniga i le 'o'otiina o le lipine e le Faletua o le Toeaina, Lotofoa Iosua Lologa. Ona foa'iina lea o Ki o lenei galuega e le Tofā ia Namulau'ulu Lale Siufaitotoa Ieremia. O ia fo'i o le Agai o Tupu/Matua o Faiva sa nafa ma le galuega. Sa faitauina e Vilia Autalaga (AM) le Tusi Paia. O a'u sa ou faia le Tala o le Galuega, a o Simoli Ama (TK), sa fofogaina le Tala o Tupe. O le Susuga i le Toeaina Petaia Lokeni (FT), sa ia saunoa i le tatalo e ofoina atu lenei falesa i le Atua. O le Susuga ia Fotuonuupule Perelini (FS), sa ia saunia talosaga. A o le Susuga ia Alosina Vavae (FS), sa lauga ma saunoa i le Upu a le Atua, o fa'amanuiaga ma alofa'aga molipō mai le Paia o Eteveni. O a'u sa ou ta'ita'iina le Sakarameta paia o le Fa'amanatuga, a o le Susuga ia Talia Vaalele Tapaleao (FS), sa ia tau'a'aoina atu le meaalofa e \$30,000NZD a le Ekalesia Aoa, e tusa ma lana Iugafono faavae mo galuega a Aulotu. Ua lē mafai ona auai mai le paia i le Laulau o le Fono Tele mai Samoa e tusa o le valaau fa'aaloalo, ona o tapu o le Faama'i Koviti 19.

O tupe sa faia ai lenei galuega:

\$50,000.00 Toomaga - Nofoa o le Falesa

\$500,000.00 tupe fa'aputu a le aulotu

\$1,000,000.00 nonoga tupe Christian Saving Bank

O meaalofa mo le galuega:

O le laulau Faamanatuga - Woodstar Kamupani sa faia nofoa o le falesa.

Pulela'a Autū - Palemia & Rosa Lafolafo ma le fanau - \$6,647.00

Pulela'a Fai Folafolaga - Soagia T. & Taemanea Siau ma le fanau - \$2,540.00

Tanoa Fai Papatissoga - Tavau Iosia ma le fanau - \$1,500.00

Ipu o le Faamanatuga - Tofilau M. & Elisa Ropati - \$3,000.00

Ipu mo Taulaga - Tapusoa S. & Fialelei Salelea - \$300.00

Molī teuteu - Tuiatua T. & Vila Papua - \$7,000.00

Tioata lanu - Aoga Aso Sa & Tupulaga Talavou - \$10,000.00

Fa'aleotele Leo & TV - Aufaipese - \$18,000.00

Nofoa Falesa - Mafutaga Tamā - \$91,000.00

Kapeta & Vinyl Falesa & Hall - Mafutaga Tinā - \$30,000.00

Tu'ufa'atasiga o meaalofa: Ekalesia Aoa, Susuga i Toeaina, Susuga i Sea, Faafeagaiga, Paia o Ekalesia, o Aiga o le Aulotu, o uo ma aumea mamae, o nu'u ma aiga o le Faifeau ma lona Faletua - \$718,681.50. Ia totogi atu e Le Atua lou mā'au, lou alofa ma lou agalelei.

O la Iesu, "Ai se avane foi tau lava o se ipu vai mālūlū e inu ai se tasi o i latou nei e fa'atauva'a i le igoa o le so'o, e moni, ou te fai atu ia te outou, e le māumau lona tau."

Ia fo'i pea le vi'iga i le Atua, o Ia na te fa'atutumu lou tamā'o'aiga ua fa'agaogaoina. FA'AFETAI, FA'AFETAI, FA'AFETAITELE LAVA.

*Saunia: Palemia Lafolafo FS
Faafeagaiga EFKS TAKANINI,
MATAGALUEGA MANUKAU.*

(Ata o le Malumalu & Hall @ itulau 1)

NA O AFIOGA E TULEI MAI FOFOGA O LE ATUA

(1) “*12E afua mai le amataga o le tausaga e oo atu lava i le gataaga o le tausaga.*” Teute.11.

A o tatou ulufale mai i lenei tausaga fou 2021, o Afioga paia nei a le Atua e avea ma fesoasoani, e fai ma ta’iala e limata’ita’iina ai i tatou: “¹⁰*Auā o le nuu a e alu i ai e fai mo oe, e le pei o le nuu...na outou o mai ai, na e luluina ai lau saitō, ma faasūsūina ai lou vae, pei o se fanua o laau iti e ‘aina;* ¹¹*a o le nuu a outou o atu i ai e fai mo outou, o le nuu lea o mauga ma vanu e inu lava i le suāua mai le lagi.* ¹²*O le nuu e tausia e le Alii lou Atua, e le aunoa ona silasila i ai o le Alii lou Atua, e afua mai i le amataga o le tausaga e oo atu lava i le gataaga o le tausaga.*” Teute.11.

E amata i le toe tepa i le tausaga na o mai ai, poo le nofoaga talu ai. “*E le pei o le nuu o Aikupito na outou o mai ai..*” O Aikupito sa fai ma nuu o le popole ma le atuatuvaale, o puapuagā, tiga ma le pologa sa tautiga ai. Peitai o Kanana o le nuu o faamanuiaga e foai fua mai e le Atua, o le tofi totino mai le Atua, le nofoaga o le tupu a’e ma le ola lausiusi faaleagaga. Inisi faaupuga, o lenei tausaga ua amata, e lē tataua ona pei o lona tausaga ua te’a. Aisea? Auā o le Alii lou Atua e alofa ma ua sauni e tausi ia te oe. Fai mai Jeremia, “²¹*O le mea lenei ua toe manatu i ai lo’u loto, o le mea lea e faamoemoe ai a’u.* ²²*O le alofa o le Alii ua le faaumatia ai i tatou, ona ua le mavae o lona alofa mutimutivale;* ²³*e fou mai ia i taeao uma; e tele lou faamaoni.* ²⁴*Ua faapea ifo lo’u loto, O lo’u tofi o le Alii lea, o le mea lea ou te faamoemoe ai ia te Ia.* ²⁵*O loo agalelei le Alii i e faatalitali ia te ia, o le tagata e saili ia te ia.*” Auega 3. Fai mai Tavita, “⁵*Auā o lona to’asā ua se emo o le mata lea, a o lona alofa tunoa o le ola lava lea; e afe ane le tagi i le afiafi, a o le alaga fiafia i le taeao.*” Sala.30.

E leai se mea e te atugalua ai pe popolevale i mea a tutupu i le lumanai ma le savaliga o lenei tausaga. O le a oulua feiloa’i ma le agalelei, le alofa mutimutivale, le faamaoni, le alofa ma le lagolago malosi o le Atua mo oe ma lou olaga.

(2) “*11O le nuu o mauga ma vanu.*”

O lenei tausaga ua amata o le a e fetaia’i ai ma ni mauga faapea foi le uia o ni vanu. Ma e te manaomia nei mea e lua. O le malosi e te maua mai i le a’eina

ma le manumaloina o mauga talu ai, o le a mafai ai ona e gafatia isi vanu i le lumana’i. O totonu o vanu e sili ona ola lelei ai fualaa’aina e aupito sili ona suamalie. E mafua lea ona e faasūsūina e vaiatafe o loo tafe ifo mai luga o mauga. Na fetalai Iesu, “⁸*E viia lo’u Tamā i lenei mea, pe a outou fua tele mai; ona fai ai lea outou mo’u so’o.*” Ioa.15. E finagalo Iesu ina ia avea lenei tausaga e te fua tele mai ai i lau auunaga mo Ia. Ma ua faasino mai foi e Ia le auala tatou te fua taufeti’iti’i ai. “⁴*Ina tumau ia o outou ia te a’u, o a’u foi ia te outou. Faapei o le la e le mafai ona fua pe a na o ia, pe afai e le mau i le vine; e faapea foi outou, pe afai tou te le tumau ia te a’u.* ⁵*O a’u nei o le vine, o la outou. O lē tumau ia te a’u, ma a’u ia te ia, o ia lava e fua tele mai; auā e le mafaia e outou ona fai o se mea e tasi pe a a’u le i ai.*”

O le a le ituaiga fua o loo saili mai e le Atua ia te oe i lenei tausaga? Ua ta’u mai e Paulo e faapea - (afai e pulea e le Agaga Paia o tatou olaga, o le a Ia faatuputeleina nei fua i totonu o i tatou) “²²*A o le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le faamaoni,* ²³*o le agamalu, ma le amio mamā; e le faatulafonoina mea faapena.*” Kala.5. E lē o lou tautigā e galue malosi ina ia fua mai ai le seleselega tele i lou lava atamai ma lou malosi – ae o lou tumau ma pipii i le Vine ina ia mafai e le Agaga ona galue mo oe. O le mea lea i lenei tausaga, pe a e tau atu i mauga pe uia vanu, ia manatua o loo faatasi le Atua ma oe i lau malaga.

(3) “*11A o le nuu a outou o atu i ai e fai mo outou, o le nuu lea o mauga ma vanu e inu lava ia i le suāua mai le lagi.*”

I lenei tausaga, ia vaavaai a’e i le Atua mo le faamalieina o ou mana’oga. Po o le a lava le vaega faaupufai o loo pulea le malo, o le a foi le tulaga o i ai le taugatā ma le maualuga o le tau o le soifuaga, o a lava faama’i pepesi ma loulouā o lapata’i mai, ia e talitonu i le Atua o Ia na te foa’i mai mea e te mana’o ai. Ma e na te fa’aaogāina tagata eseese e faatinoina Lona faamoemoe! Ua fetalai Iesu, “³⁸*Ia outou foai atu, e foaiina mai ai ia te outou; e foai mai e i latou i lo outou lava ie pulupulu le fua lelei, e lolomi ma luluina, e tumu ma solo i tua.*” Lk 6. E fa’aaogā e le Atua isi tagata latou te faamanuia atu ia te oe, peitai na o le Atua lava le puna o ou manuia.

Ia 'aua nei galo lenei mea! Pe afai e te vaai ifo i totonu ia te oe, ona e iloa lea o lou gaogao ma le ausage. Pe afai e te vaai ane i ou autafa, e te iloa ai isi tagata o loo faapena foi ona tauivi ma lea lava taua. Peita'i afai e te vaai a'e i le Atua, e te iloa ai o Ia, ²⁰*O Lē na te mafai ona faia o mea uma e faasilisili lava i mea tatou te ole atu ai ma mafaufau i ai, e tusa ma le mana o loo matuā galue i totonu ia te i tatou.*”Efe.3. O le a e iloa foi e mafai ona e faalagolago ia te Ia: ⁸*O le faatuatua i le Alii, e sili lea i le faalagolago i tagata.*”Sala.118. E i ai nisi taimi e tuu ai oe e le Atua se'ia e oo i le pito maea tupito, ina ia faailoa ia te oe, pe afai ua augapiu ma se isi fesoasoani, ua na o le Atua lava ua totoe; ma e na o Ia lava e te mana'omia mo lou lave'aiina! Ia maitau le fuaitau - **le suāua mai le lagi.** O lenei faaupuga o faamanuiaga e tutusa lelei ma le isi foi folafolaga na fai e le Atua: ¹⁰*Ia outou tofotofa mai ai ia te a'u i lenei mea, ua fetalai mai ai le Alii o 'au; pe ou te lē toina pupuni o le lagi mo outou, ma sasa'a atu le manuia mo outou, ina seia silisili ona tele.*”Mala.3. I lenei tausaga, ia e usiusita'i i le Atua ona fai lea o manuia o le Lagi mo oe.

(4).”¹²O le nuu e tausia e le Alii lou Atua, e le aunoa ona silasila i ai o le Alii lou Atua, e afua mai i le amataga o le tausaga e oo atu lava i le gataaga o le tausaga.” Teute.11.

O lenei tausaga o le a tausia ai oe e le Atua. E pei o le tamā lelei i le tausiga o le atalii e alofa i ai, o le a faapena ona leoleo le Atua ia te oe, na te lē aveese ona fofoga mai ia te oe. Ma e na te faia mai le amataga o le tausaga e oo atu i le gataaga o le tausaga. O ai se tasi na te mafai ona folafola ma faataunuu se ituaiga tausiga alofa faapenei? Atonu e avanoa lau loia, lau foma'i, lau faletupe mai le Aso Gafua e oo i le Aso Faraile pe afai e lē pisi pe tuatuagia; ae afai e leai, o lona uiga e te fiu e fesoota'i i le telefoni, o feau tusitusia, e-meli ma isi auala o fesootaiga. Ae afai e te gasegase, talosia ia e vave oo i le foma'i ae lē o le lisi faatalitali.

E lē faapena le tausiga a le Atua. E mautinoa Lona silasila, leoleo ma tausii mai ia te oe i sekone ma minute taitasi o le uati. Peitai, e i ai lau vaega e fai: Teute.11, ¹³*Afai foi tou te matuā faalogo i a'u poloaiga ou te fai atu ai ia te outou i le aso nei, ia outou alofa atu i le Alii lo outou Atua, ma auauna ia te ia ma o outou loto atoa ma o outou*

agaga atoa, ¹⁴ona ou foaiina atu lea o le ua i lo outou nuu i ona tausaga, o le uaga muamua ma le uaga mulimuli, e te faapotopoto ai foi au saito (o taumafa/tausami uma e manaomia), ma lau uaina (olioli ma le fiafia), ma lau suau'u (o le paoa ma le auai mai o le Atua). ¹⁵Ou te tuuina atu foi laau iti i lou laueleele mā au manu (o au faaputuga tupe ma pisinisi); e te 'ai foi, ma e ma'ona (faamanuiaga i tofi ma tiute). O le aano o le mataupu: afai e te lua savavali ma le Atua ma e faamamaluina Lona suafa i mea uma e te faia, ona ave lea o lenei tausaga o se tasi o tausaga e sili ona manuia o lou olaga atoa.

(5)“¹²Ia tatou fefaamafanafana'i i lo tatou faatuatua, o outou atoa ma a'u.” Roma 1.

I lenei tausaga pe afai e te savali i totonu o le vao mafafia o faafitauli ma mafatiaga, ia e mafaufau loloto i le mea o loo tupu i le natura o vao ma laau, i lalo ifo o le eleele ma le vao o loo e savali ai. O a'a o isi la'au e fesoloa'i, fesopoa'i ma fesoota'i ma a'a o isi foi laau tū tuaoi, ma latou fausia ai se upega o fesootaiga tuufaatasi. O le tasi e saofagā i le suavai, o le tasi e oo atu ma miti'ia mai minerale, o isi e maua atu le susulu o le la ma 'apo mai. E leai se laau e tasi na te maua uma ia mea, ae peitai o le latou galulue so'oso'o tau'au faatasi e mafai ai ona latou ola ma tutupu a'e, e tauivi ma gafatia afā ma matagi malolosi o le olaga. ¹⁵*Ia tutupu i tatou ia te Ia i mea uma, o le ulu lava Ia, o Ia foi o Keriso; ¹⁶e mai ia te Ia ona tupu o le tino uma lava, o loo o faatatauina ma faasooina i ua uma lava e fesoasoani i ai, e tusa ma le galuega i le fua o le itu tino taitasi, ia i'u ina atiina a'e le tino e ia lava i le alofa.*” Efe.4.

O nisi o i tatou e mai le ituaiga tutoatasi e lē fiafia i lenei faiga soofaatasi. Tatou te fia felelei toatasi se'ia oo ina taia i tatou ma pa'u'ū ifo ai, ona faatoā lagona lea e mana'omia mea nei:

(i)Faamalosi'au. ¹⁶*Ia alofa atu le Alii i le aiga o Onoseforo; auā na ia faamafanafana soo mai ia te a'u, e le'i mā foi o ia i o'u filifili uamea, ¹⁷a e peitai na i Roma o ia, ona matuā saili mai lea o ia ia te a'u, i le ua maua.*” II Timo.1.

(ii)Alofagia. ¹²*O lenei, ia oofu outou i le alofa mutimuti vale, ma le agalelei, ma le loto maulalo, ma le agamalū...:Kolo.3.*

(iii)Faamagaloina. ¹³*Faapei ona faamagaloina mai le Alii ia te outou, ia faapea foi outou.*” Kolo.3. O le ā le mea na te faaosofia i tatou e faao'o atu le alofa i isi tagata? O le alofa o le Atua mo i tatou!

O A TATOU MEA E 'AI E TATAU MA LE ASO

OLE TALALELEIAMAREKO (1). TALA LELEIMO TAGATAUMA

Aso Gafua, 25 Ianuari 2021

Auala e faasa'o ai a tatou faamuamua faaleagaga.

Aso Sa, 24 Ianuari 2021

Lavea'i matou ai le leaga; auala na fa'aatoatoaina
ai tatou e Iesu.

Tusi Faitau - Mareko 3:7-12. ¹⁰Auā e toatele na Ia faamaloloina, o lea ua fetaomi mai ai ia te Ia e na maua i ma'i tiga, ina ia latou papa'i mai ia te Ia. ¹¹O agaga leaga foi, ua latou iloa mai o Ia, ona faapa'u'ū lea o i latou i ona luma, ma latou alalaga, "O oe lava o le Alo o le Atua." ¹²A ua matuā vavao atu o Ia ia te i latou, 'aua ne'i latou fa'aalia o Ia."

O le tulaga aupito sili ona maualuga i nei ulua'i mataupu o le Tala Lelei a Mareko, o le pule lea a Iesu. O Ia le totonugalēmū o vaaiga. E manana'o tagata uma e fia latalata ia te Ia. I le faitauga leneni, o loo Ia a'oa'o atu i luga o le matāfaga, ma na o le pau le auala e maua ai sina avanoa mo Ia, o lona au soo ina ia latou tulei ese teisi o Ia mai le auvai i luga o se vaa. O loo ta'u mai iinei se feau, i se lalolagi o mana'oga fia faataunuu ma fesili e fia maua ni tali, ma o Iesu e mafai ona Ia aumaia.

Ae i ai ma isi tulaga e sili atu nai lo ia. O loo faamamafa e Mareko fesaga'iga a Iesu ma agaga leaga, poo agaga 'lē mamā'. Inisi vaega o le Ekalesia i aso nei, tatou te lē manofonofono lelei pe a faalogo i lea ituaiga gagana. Peita'i e lē tatau ona tatou faamamalu pe faamamapo faaonaponei, tatou te lē iloa lelei ai mea tonu o loo tutupu: o se vaega o le faasilasilaga e Iesu o le Malo o le Atua, lona faafesaga'i ma faatoilalo i agaga leaga e moni lo latou tino mai. O le Tala Lelei e mo le tino, mafaufau ma le agaga. Na faamalōlō e Iesu tagata mama'i ma suia olaga o tagata. Na Ia faamalamalamaina mafaufau pogisā ma a'oa'oina i latou faasino i le alofa o le Atua. Ae na Ia mautinoa foi le moni o le i ai o le leaga, ma na Ia gauia le malosi/fia malosi o le leaga, i soo se mea na te maua atu i ai.

†Le Atua e, fesoasoani mai ia matou iloa vaivaiga, le valea ma le agasala i o matou olaga. Faafetai ona e i ai le mana o Iesu ma Lona malosi e sili atu nai lo soo se ituaiga leaga. Amene.

Tusi Faitau: Mareko 3:13-19a, ¹³Ua maliu a'e o Ia i le mauga, ona valaau atu le o Ia i e ua Ia finagalo i ai; ona latou o mai lea ia te Ia. ¹⁴Ona tofia lea e Ia le toatinoagafulu ma le toalua, ina ia latou faatasi ma Ia, ina ia auuina atu foi i latou e tala'i le Tala Lelei; ¹⁵ina ia tuuina atu foi le pule ia te i latou, latou te tutuli ai temoni."

O loo i ai se faamatalaga i le valaauina o ulua'i soo, e faigofie ona misia. Ua filifilia e Iesu le to'a 12 ma auina atu i latou e folafola le Tala Lelei, ma tuuina atu i ai le pule e tutuli ese ai temoni mai tagata. Mo nei tama tane talavou i se aai itiiti, o se mea manaia ma fiafia tele leneni mo i latou. O le a ta'uta'ua ma tāua i latou i le vaai a tagata. Atonu foi o le a faimalaga atu ma asiasi i tulimanu o le lalolagi. Peitai e lē o le ulua'i faamoemoe lea na valaauina ai i latou e Iesu. O le fuaiupu e 14 o loo manino ai le filifilia e Iesu o le to'a 12 'ina ia latou faatasi ma ia'. Inisi faaupuga, o le faamuamua e lē o galuega fai ma faatinoga e faalauiloa atu ai i latou ma faafo ai tagata, e leai. Ae o le tau lava ina ia faatasi ma Iesu. O le toatele o i tatou, pe afai tatou te faamaoni, tatou te manana'o ina ia amana'ia i tatou e tagata. Tatou te fiafia tele pe afai e lauiloa i tatou ma talanoa tagata e uiga ia i tatou ma tatou galuega. E toatele faifeau folafola e nene'e ma faamalosi atili i le faaviivii ma le opogi e a latou aulotu ma faapotopotoga – ma e leai se afaina o lea tulaga! Peitai e pei o le au aposetolo, ua valaauina i tatou ina ia muamua lava ona faatasi ma Iesu. O le mafuta faatasi ma Iesu o lona uiga ia muamua lava lagona le loto maulalo. Afai tatou te faatasi ma le Mataisau o Lē na foafoaina le lalolagi, tatou te iloa lelei ai lo tatou tulaga. O lona lua, o lona uiga ia tatou sālō ma faalologo. O le au soo sa faatasi ma Iesu e le'i taumafai e pulea talanoaga ma fetufa'iga, pe tuu faamalosi o latou lava talitonuga i tagata. Ma lona tolu, o lona uiga ia naunau e a'oa'oina mai. E na o le mae'a ai o le tulaga lea, o le a mafai ai ona saunia lelei i tatou e faafesaga'i ma mata o tagata lautele. O le galuega tala'i, i soo se ituaiga – ma o tatou uma e tofū ma se ituaiga tala'iga – e amata i le mafuta faatasi ma Iesu. A aunoa ma lena, o le ā lava le tiute tatou te fai mo Ia, o le a siliga tali i seu sona tāua tele.

Aso Lua, 26 Ianuari 2021

O le agasala lē magalo, ma le ala e 'alo 'ese ai.

Tusi Faitau: Mareko 3:19e-35, “²⁸E moni, ou te fai atu ia te outou, E faamagaloina agasala uma a tagata, atoa ma upu faifai uma latou te faifai ai; ²⁹a o lē faifai i le Agaga Paia, e lē faamagaloina o ia, a le tu a le tu lava; a e peitai e nofo sala o ia i le agasala faavavau”: ³⁰auā na latou fai mai, “O ia te ia le agaga leaga.”

E sili atu nai lo le tasi tala faanoanoa o se tasi/nisi ua talitonu ua latou solia le agasala aga'i i le Agaga Paia ma e lē mafai ona toe faamagaloina. O nei tagata – e pei o le tusi solo ma tusi pese o Viliamu Koupa – e masani ona maua i se ituaiga gasegase o le mafaufau. I le ituaiga faaupuga na faaupu ai e Iesu lana lapataiga, o lenei agasala e matua'i lē mafai e se tasi ona solia. I lenei vaega o lana talaiga, sa molia ai o Ia i lona fai paaga ma le tevolo ma faatino ana vavega i le paoa o Satani. Na ia tali atu i ona fili e matuā sesē matuā nei moliaga, ma na Ia fai atu foi o nei faamatalaga ma moliaga sesē faasino ia te Ia ma lana galuega, e i ai ona tuatuagia e faavavau. Soo se tasi e talitonu o Iesu e leaga – ua oo i tagata o lona lava aiga – e i fafo atu o soo se ituaiga o fuafuaga sagatonu faalemafaufau. E leai se tasi e mafai ona ia ta'utino faapea i nei aso; e oo lava i fili aupito fe'ai o le faa Kerisiano e leai sa latou upu leaga e fai faasino ia Iesu. Peitai e lē faapea ua lē talafeagai ai lana fetalaiga lenei. A o savalia e Iesu le fogaeleele, sa faia ai e le Atua se mea e fou ma lelei, ae toatele tagata na latou te'ena. O le loto masalosalo ma le ola tete'e, na latou pipi'i ai pea i mea sa latou iloa ma masani ai, ma pogisa ai o latou mata i mea ofoofogia ua ofoina atu e le Atua. Mata e lē mafai ona tatou solia le agasala lē faamagaloina. Peitai e mafai lava ona tatou teena mea lelei, ona e ese mai mea ua tatou masani ai ma e tatou te le'i vaai pe faalogo muamua i ai. Pe afai tatou te faia faapea, ona tatou tuu lea o i tatou i le itu agai, ma le itu sesē o fuafuaga a le Atua mo i tatou.

†Le Atua e, faafetai i lou alofa ma lou agalelei e fou i taeao uma. Fesoasoani mai ia pupula o matou mata ma tatala o matou loto i mea fou e te faia, tusa lava pe foliga ese ma faa-atuatuva. Amene.

Mo Mafaufauga Atili: E i ai ni taimi sa ou lē iloa ai le Atua o galue, ona sa ou lē fiafia pe lē talitonu i se tagata, sa tatau ona ou talia?

Aso Lulu, 27 Ianuari 2021

Sili atu i matematega upu: Faapefea ona fa'aaogā faataoto?

Tusi Faitau: Mareko 4:1 – 12, “¹Ua toe amata o Ia ona a'oa'o atu e latalata i le vai, ua potopoto mai ai ia te Ia le motu o tagata e toatele; o le mea lea na maliu ae ai o Ia i le vaa, ua nofo ai i le vai; a o le motu o tagata uma sa i le auvai i latou. ²E tele mea ua Ia a'oa'o atu ai ia te i latou i faataoto...”

Ua tatou masani lelei ma lenei faataoto i le Lūlū Saito ma le faamatalaga o lona uiga na ta'u atu e Iesu i ona soo mulimuli ane. Ua tatou iloa o le fatu saito o le Upu a le Atua, ma ituaiga eleele eseese o ituaiga faalogo eseese ia e ola lelei ai le Upu a le Atua, pe leai foi. Peitai mo le ulua'i au faalogologo a Iesu, mata sa le'i matuā manino ai i latou. E i ai foi isi ana faataoto, o lana faauigaga e lē vave manino mai. O le 'mea lilo', na Ia fai atu ai i ona soo, o lona a'oa'oga e faailoa i isi ae natia i isi. I se tasi itu, o le a'oa'o atu i lea ituaiga auala o se faiga atamai tele. E sili atu ona tatou manatua se a'oa'oga pe afai tatou te faavasegaina ma galueaina le tali e i tatou lava. O faia'oga e faalagolago i le auala o le 'penisina ma tautala', lea e tū i luma o le vasega ma faamatala mea uma ia i latou, e lē tusa lo latou lelei mata'alia ma faia'oga latou te tuu avanoa i le vasega e auai faatasi i saililiga, ma fai ai e latou a'oa'oga mai a latou su'esu'ega. O le sailia o le uiga loloto o se faataoto, e avea ma ala e 'ola' mai ai lea faataoto mo i tatou. Ma e i ai ma se isi mea e sili atu o loo iinei: peisea'i o loo faapea mai Iesu, o loo Ia a'oa'o ma fetalai faapea ma le fuafuaina mautinoa, ina ia lē malamalama ai nisi tagata. Ma o tua atu o lenei auala, o loo i ai le manatu faapea, o le a'oa'o ina e sili atu nai lo le poto i le mafaufau. O nei faataoto o le faamoemoe ia a'oa'o ina le loto faapea le mafaufau. Latou te faia suiga ia i tatou, ma e tatau ona tatou naunau ina ia suia. Latou te fesiligia i tatou i ni lu'itau faigatā: o le ā le ituaiga eleele lea ou te i ai? O le ā le loloto o le maua'a o le Upu a le Atua i totonu ia te a'u? O faataoto e sili atu nai lo ni paso po o ni matematega upu.

†Le Atua e, fesoasoani mai ina ia ou faitau lau Afioaga ma le tatalo, ma le loto maualalo ma le faaeteete. Ia fetalai mai Upu a Iesu i lo'u loto, ma lavea'i a'u mai le faapea ifo ua ou malamalama i ai, pe afai latou te le'i suia a'u. Amene.

Mo Mafaufauga Atili: Pe afai e muta le faaofoina pe faaosofia o i tatou e le Tusi Paia, masalo e mafua, e lē ona ua tatou malamalama lelei i ai, ae ona o lo tatou lē manino atoatoa i ai i lona uiga moni.

Aso Tofi, 28 Ianuari 2021

Faasusuluina o le malamalama i le faataoto e ofoofogia lona pogisa.

Tusi Faitau: Mareko 4:13 – 25, “²¹Ua fetalai atu foi o Ia ia te i latou, ‘E au mai na ea se mōlī ina ia tuuina i lalo o le mea e fua a’i saito, po o i lalo o le moega? E lē faatuina ea i luga o le tuugāmōlī? ²²Auā e leai se mea lilo e lē fa’aalā; e leai foi se mea e nātia, a e i’u ina faailoa lava.”

I le ulua’i vaaiga, o lenei faataoto a Iesu tatou te mafai ona lue i ai o tatou ulu – tatou te ioe ua tatou maumautai. O se faamatalaga manino o se mea e malamalama lelei ai le au faalogologo, ma e mafai foi e soo se tasi i nei aso e i ai sana togalaau ona malamalama foi i ai – e tataua ona sa’o le palapala ina ia ola lelei ai laau totō. Ui i lea a tatou mafaufau atili i ai, ona amata lea ona faasolo ina nenefu. O le eleele le mea tāua. E liua nisi tagata e avea ma Kerisiano toaga lelei i le lotu, ona ua pau lava sa avea i latou o eleele lelei mo le Upu a le Atua. O nisi tagata e lē faapena, ona sa latou le’i faapea. E pei lava e faalē paleni.

O le mea manaomia tatou te aumaia i lenei tala, o se mea mai lava i le amataga i le Tusi Paia, ma le faai’uga o Evagelia. I le Kenese 2 o loo ta’ua ai, “⁸Ua faia foi e le Alii le Atua o le faatoaga i Etena i sasa’e.” I le Ioane 20:15 o loo ta’ua ai Maria, na sesē o ia faapea o se faifaatoaga le Keriso toetū. O se fetaula’iga mata’ina tele lenei, na te faasino i tatou i se tali o la tatou faafitauli. O le eleele e pa’ū i ai le fatu atonu e faalē lelei – e papa’u, pe fili faatasi ma vao tuitui, pe mago ma malō. Peitai o le Atua o se Fai-faatoaga. Na te nutinini’i le laueleele malō ma faamamā le vao. O tagata sa tatou le’i mafaufauina, ua latou lagona Lana Upu ma tali i ai. E lē tataua ona tatou matuā vavae’eseina soo se tasi, auā tatou te lē mailoa pe faapefea ona galue le Atua i o latou olaga – ma o loo Ia valaauina le au Kerisiano ina ia galulue fai paaga ma Ia, e auauna tautigā faatasi ma Ia e tapena lelei le eleele mo Lana Upu.

† Le Atua e, faafetai e le’i uma lou alofa, e te le’i fiu ia te a’u. Se’i e talepe ma faamalūina le eleele malō

i totonu ia te a’u, ia faaloloto le eleele papa’u ma faamamā ese o vao. Ia susulu mai lou malamalama i lo’u olaga. Amene.

Mo Mafaufauga Atili:

“²⁵Auā o lē ua i ai mea, e avatua pea ia te ia.” O eleele lelei e maua mai ai le seleselega lelei. E faapefea ona galueaina lo’u agaga ia avea atili pei o Keriso?

Aso Faraile, 29 Ianuari 2021.

Faailoilo o le ola: iloa manino le Malo o le Atua.

Tusi Faitau: Mareko 4:26 – 34, “³⁰Ua fetalai atu foi o Ia, ‘Se a se mea tatou te faatusa i ai le malo o le Atua?...³¹E tusa ia ma le fua o le sinapi; a totōina i le eleele, e sili ona laitiiti i fua uma e tutupu i le eleele. ³²Pe a totōina foi, ona tupu a’ e lea, ua avea foi ma laau tele, ua sili i laau uma e afu, ua fai foi ona lā tetele, e mafai ai manu felelei ona momoe i lalo o lona paolo.”

O le fua faa-tutusa o le ola o le Malo o le Atua ma le ola o le Ekalesia o se faaososoga e tupu soo. E sa’o le manatu, mata o se Ekalesia e tumu ma toatele e ono sili atu nai lo se Ekalesia e gaogao ma to’aitiiti. O le finagalo o le Atua mo le tagata, ia tupuola i le tino, mafaufau ma le agaga; ma o fea se nofoaga e sili atu ona vaaia ai le tupuola faaleagaga nai lo totonu o le Ekalesia? Ui i lea, e i ai mea e sili atu nai lo ia. O le pule a le Atua e sopoia tua atu o pa ma puipui o le Ekalesia. E aofia ai le faamasinoga amiotonu, le filemu ma le toe faaleleiga, ae lē na o lauga masausau poo aufaipese leo malie. O lona uiga, e i ai le fete’enaiga: o se Ekalesia itiiti e faia le tapuaiga faamaoni i le Atua, e maloloina lelei lona ola fesootea’i ma faia a ona tagata, ma o lena to’aitiiti o loo taumafai e fai suiga i le lalolagi, e sili mamao atu lona avea ma faailoga o le Malo o le Atua, nai lo se Ekalesia maoa’e le telē, ae tataua ona e vave alu i le falesā ne’i leai sou nofoaga. O lenei fete’enaiga o loo faalogoina i le faataoto lenei a Iesu i le fua o le sinapi. O i latou sa faalogo i ai sa leai so latou malamalama pe faapefea ona tupu ma ola laau totō. O aso nei, ua tatou iloa lelei le mea e tupu. E mafai foi ona tatou faia nisi auala togafiti faasaienisi ina ia vave ona ola ma sili atu ona lelei lo latou fua mai. Peitai e taia pea i tatou i le ofo i vavega o tausaga taitasi e lanu meamata ai le fanua i le tau o le togotoga a’e. O lona uiga, e lē tataua ona i ai so tatou manatu faapea e mafai ona tatou pulea ma faatonutonuina le tupu a’e ma le ola

o le Malo, peisea’i a tatou maua tonu le fuafaatatau sa’o, ona mafai lea ona tatou faatupu, faaola ma faafua mai le Ekalesia, pe faatupu salalau le amiotonu ma le ola gatasitasi. Leai e lē o i tatou, o loo a’oa’o mai ai Iesu iinei, a o le Atua e pule. E lē o lona uiga ia ‘aua tatou te galulue faamalolosi i le Ekalesia. Ae o lona uiga, tatou te vaavaai, faatalitali, faalagolago ma faamoemoe i le Atua na te aumaia le tali ma le i’uga, e tusa ma Lana pule, i Lona lava taimi.

† Le Atua e, fesoasoani mai ia ou talitonu i vavega. Fesoasoani ina ia ou faalagolago i lou malosi, ae ‘aua le manatu ou te faia mea uma. Ia ou mataala i taimi uma mo faailoilo o lou Malo.

Aso Toonai, 30 Ianuari 2021

Ua i ai i le vasa: faatuatua ina ua lē leoa le Atua.

Tusi Faitau: Mareko 4:35 – 41, “³⁷Ona to mai lea o le afā, o le matagi tele lava; ona fati mai ai lea o peau i totonu o le vaa, ua tumu ai. ³⁸A o Ia sa i le taumuli, ua tōfā i le aluga; ona latou fafagu lea ia te Ia, ma fai mai ia te Ia, ‘Le A’oa’o e, e te lē manatu mai ea ia te i matou a fano?’”

O le ata o Iesu o loo moe gase a o agi le afā o se ata faamomoiloto. O loo tōfā o Ia pei o se tama itiiti i vae o lona tamā. Ae ina ua Ia ala mai, ua Ia faatino le mana silisili ese i le matagi ma peau, o faatusa o le malosi o le pouliuli ma le soona nunumi sa faatoilalo e le Atua i Lana Upu i le foafoaga (Kenese 1:1-3). E i ai se pese lotu matagofie faaulutala, ‘Tamā Faavavau, Malosi e Lavea’i’, e fesootai faapitoa i le vaega’au faafitafita o le gataifale. O le tali o lea pese e faapea, ‘Faafofoga mai, pe a matou alalaga/Mo i latou, o afatia i le vasa’. O se pese e lē fai mo na o tagata folau i le sami. O le toatele o i tatou e i ai se taimi o le olaga e peisea’i ua i ai i le vasa, ua leiloua, matata’u ma tauau ina faiaina i le loulouā. Tatou te lē o talotalo, a e o loo tau apatā ua malelemo, e pei ona faaupu ai e le tusi solo o Sitivi Simiti. O lea la, o le tala o loo faamatala e Mareko o se tala ua tatou masani lelei ai. Ua oo mai le atuatuvalet/femēmēa’i ona ua tatou manatu e leai se tasi o loo ta’ita’i ma pulea le malaga. Ua leai le Atua; o loo tōfā Iesu, ma ua tatou goto ifo. O Kerisiano e lē tatau ona manatu o le faatuatua na te laveai i tatou mai taimi faigatā, pe faapea o le a afio mai Iesu e lavea’i i tatou, a o tatou gafatia ona fai le fuafuaga. Peitai e i ai taimi e

fetaui lelei ai le lagona o le fefe. O le popole ma le fefe, i mea tau tupe, i le soifua maloloina, i le galuega, i e pele ia i tatou, e faaputupu faafaula’i ma latou faatumuina atoa o tatou tafailagi. O le tala a Mareko i lenei aso o loo ta’u mai ia i tatou, e ui ina o loo lē leoa Iesu, ae o loo mautinoa le loloto o Lona auai mai. E i ai o Ia i le mea o puapuagatia ai i tatou uma i ogasami aupito sousou o le vasa.

† Le Atua e, ua e silafia o’u aso ma o’u ala faigatā. Fesoasoani mai ia ou faatuatua o loo e faatasi ma a’u tusa lava pe e te sālō ma lē leoa; fesoasoani mai ia ou talitonu e lē lōfia a’u e le vai. Amene.

Mo Mafaufauga Atili: “⁴¹ua usiusita’i lava le matagi ma le vai ia te ia.” O le ā se eseese e fai e le talitonu ia Iesu i lo’u olaga o aso taitasi?

Aso Sa, 31 Ianuari 2021 (Aso Sa Tupulaga)

O le Salamo a Tavita

Tusi Faitau: Salamo 18: 1 – 19, “¹Le Alii e, lo’u malosi, ou te alofa lava ia te oe...¹⁹Ua ia aumaia a’u i le mea lautele; ua ia lavea’i ia te a’u, auā ua finagalo alofa mai o ia ia te a’u.”

O le Salamo 18 o se tatalo e tumu i vaiga ofoofogia. O ai se lē faagae’etia ai? E amata i le tautinoga tuusa’o a Tavita i lona alofa i lona Alii, ona folasia auiliili lea o mea uma ua faia e le Atua mo ia, ma faai’u ai i le faamatalaga e alofa ma fiafia le Atua ia te ia. E ui ina sa tele ona faalētonu, ae sa laualuga pea le Atua i lona mafaufau ma ana faiga filifiliga. La te fesoota’i ma le Atua i soo se laasaga, ma na te faia ia mea ma le faamaoni. E tatau ona aveia lea ma fua e faavae ai foi a tatou tatalo i le Atua. O faitauga o lenei vaiaso o le a mulimulita’i ai i le lūgā-lālō o fe’umiaiga a Tavita ma Saulo, amata mai i lona ulua’i oo atu i le maota o Saulo. O le a vaai ai lona fa’aaogaina o viiga i pesega. Ma lona faatali i le faasinoga a le Atua, ma lona manatua o auala na tali mai ai le Atua i ana tatalo. E sili i nei mea uma le mata’u ma le fa’aaloalo o Tavita i le Atua ma lona taumafai malosi e fai Lona finagalo. Fai mai a ia, ‘O le Atua ua finagalo alofa mai o Ia ia te a’u.’ E fiafia mai foi ma alofa mai o Ia ia i tatou pe afai tatou te taumafai e fai pei o Tavita.

† Le Atua e, le Tamā, fesoasoani mai ia lima-ta’ita’iina i matou e lau Afio i mea uma, ma faafetai auā e te faafogaina pea a matou tatalo. Amene.

O Ē UA FAI I LAGI FOLAUGA

SAMATA IUSITINI LEILOA FS

(1/10/1957 - 28/12/2020) 63+2+28

O le Faifeau Nofo Aiga o le EFKS Faatoia, sa galue i le Ofisa Tutotonu o le Ekalesia i Tamaligi i le Vaega a le Failautusi Aoao. Na soifua mai o ia i le Aso Lua a o galulue ona mātua o Saolotoga Leiloa Iusitini FS (Uafato, Fagaloa) ma Faafeu'u Masele Leiloa (Fogatuli), i le EFKS Samata-tai, Salega. O ona uso o Ietitaia ma Filiga Saulemau (ua maliliu uma) ma tuafafine o Afualo Maluana, Afualo Lonise, Silulu, Afualo Leuatea. Na a'oga i le Itumalo Savaii Sisifo, Salailua, ma Mata-Ae-Vave ina ua toe galulue ona tua'ā i le EFKS Lu'ua, Faga Faasaleleaga, Kolisi Vaipouli, & A'oga Matātā Eseeese na maua ai lona tomai faa-kamuta. Sa galue i le Matagaluega Leoleo i Samoa ma Niu Sila, Fletcher, Nurse Aid Security i Falema'i, Avepasi i le ARA, le NZ Army Territorial. Sa ta'alo i 'au lakapi a Vaiala, a'oga Karate ma sa fai lana taavale tutu'u. Sa faaipoipo atu ia Rosalina Sio-Leiloa mai le afioaga o Laulii.

Na ulufale i Malua i le 2010, o se lupe faalele a le EFKS Grey Lynn, sa faatiakono ai e le susuga Ioritana Tanielu FT i le 2005. Na i'u mai Malua i le 2013, ona fai lea o le Matafale i le EFKS Faatoia ma tautua ai. Na faau'u i lona tofi Faifeau Samoa ia Oketopa 2020. E maliu o ia i le Aso Lua o loo galue i le Ofisa Tutotonu EFKS i Tamaligi talu mai le aso 28 Novema 2016, o le Kamuta Fesoasoani i le vaega o kamuta, palama ma fai mōlī eletise i lalo o le vaaiga a le susuga Failautusi Aoao, Vavatau Taufao FS, ma le Failautusi Fesoasoani o Anzac Tuala FS. E tusa ma le molimau a le susuga Failautusi Aoao, sa talosaga le Faifeau mo ni ona aso malolo a o i ai malologa o le Kerisimasi ma le Tausaga Fou, e asiasi atu ai i lona faletua ma le aiga i Aukilani, ma fai ai lana siaki faasoifua maloloina i Niu Sila. Sa lilo i le manatu o le tagata, le finagalo o le Atua mo Lana auuana, o le a alu lana malologa faavavau. O le ulua'i sui lenei ua maliu i totonu o se nofoaga e faanofosea ai puipuiga o le Faama'i Koviti-19 i Niu Sila.

O lona Sauniga Faaleaiga na faia i le afiafi o le Aso Sa 3 Ianuari, i le Tipene Funeral Services, na ta'ita'i e le susuga Toeaina o Mafutaga Faaleaoga FT o le EFKAS Wiri, Aukilani. Sa auai sui o ona aiga mai Vaovai, Sasina, Fogatuli ma Uafato, o sui o lana Vasega i Malua, o Toeaina ma Faletua ma ana uo.

O lona toe sauniga sa faia i le malumalu o le EFKS Grey Lynn i le Aso Lua, 5 Ianuari 2021. O le susuga i le Toeaina o Fiatepa Faa'e FT (EFKS North Shore, Pulega Waitemata) na ta'ita'i le sauniga. O Neli Alo FS na faitauina le Tusi Paia (I Nofo. 11:15-19 & Ioa. 14:1-3), Fetuliaina Pama FS na saunia Tatalo, a o Togafiti Tuaoimalii FS na faia le Lauga faamafanafana. O molimau i le soifuaga, le tautua tuavae ma le auuunaga a le Faifeau, na saunia e le tuafafine ia Afualo Maluana o le sui o aiga, o le faletua ia Rosalina Sio-Leiloa, ma le susuga Dr. Peniamina Leota FS, le faafeagaiga taulagi a le EFKS Grey Lynn. Na molimau Dr. Peniamina i se faifeau e foliga, amio ma galue matagofie; e lauga lelei, ma fiafia i mafutaga tatalo. Na ia faamalosi'au foi i le faletua faanoanoa ma aiga, ina ia lototelele ua lē mafai ona taofi Samata, ua tō ma fai le pule a le Matai; e pei ona manatu le aposetolo e taofi ia Onesemo, ae lē mafai se'ilogā e tō mai le pule a Filemoni. O lea sauniga sa mafai ona faasalalau tu'usa'o i luga o Upega Tafailagi i auala tekonolosi (ZOOM), sa auai atu ai le Ofisa Tutotonu EFKS Tamaligi faapea le EFKS Faato'ia, ma le to'atele o aiga ma uō mai nofoaga eseese i Samoa ma isi atunuu. O lea foi sa mafai ai ona fai le molimau a le susuga i le Failautusi Aoao EFKS, susuga Vavatau Taufao FS ma le Faafeagaiga EFKS Faato'ialemanū, susuga Dr. Paulo Koria FS. O Viiga o le Atua ma Pese o le Sauniga na lagiina e le Aufaipese EFKS Grey Lynn, ma le Aufaipese a le Aufaigaluega o le Ofisa Tutotonu o le EFKS Tamaligi.

O molimau uma na sa'afi faamamafa le soifua o le faifeau e talenia tele i le faa-kamuta - le taleni lea a Iesu sa Ia fausia ai amo ma suotosina e faamau i ua o povi ma asini i a latou auuunaga. O le taleni lea a Iusitini mai le Atua, sa ia fa'aaogāina lelei mo le atiina a'e ma faaleleia o lona aiga, ae maise o le galuega a le Atua. Na amata mai i le EFKS Grey Lynn, le Kolisi i Malua na avea ai ma ta'ita'i kamuta i le tele o galuega fai a le Kolisi, faasolo atu i le EFKS Faatoia ma taualuga i le Ekalesia Aoao e ala i le Ofisa Tutotonu. Na molimau Dr. Paulo Koria FS, lona fesiligia o Samata pe aisea lava na toe alu ai i Malua ua matua (53) lona soifua? Na tali o ia, (i) o le mana'o lea o lona tamā talu lona talavou (ii) ia fa'aaoga lana taleni mo le Atua ma lu'i ai isi talavou (iii) ia

faamaopoopo lona aiga i Samoa. “O vaita’i ia i le aao o le Alii.” *Faata.21:1*. E le’i sala ese foi le molimau a le susuga i le Failautusi Aoao, i le tautua lelei ma le auunaga a le uso faifeau, i galuega tetele a le Ekalesia e i ai le Malumalu Iupeli, le faafouina o le Maota Ioane Viliamu, le nofoaga o le EFKSTV, ma le tele o isi maota ma falea’oga o le Ekalesia. “Se a foi se faafetai matou te mafaia ona tuuina atu i le Atua ona o outou, auā o le olioli uma lava matou te olioli ai i luma o lo tatou Atua ona o outou.” *I Tesa.3:9*. “Le auuuna lelei e, ma le faamaoni, ulufale mai ia i le fiafia o lou Alii.” E le gata o lana taleni, ae o se faifeau foi e tausaaafia i lona va feagai ma isi tagata, e agamalū, agafiafia ma agamālie. O le ta’ita’i o le sauniga, le Toeaina ia Fiatepa na molimau foi o Iusitini o le isi toa o le Tala Lelei, e pei o toa e to’atolu na ta’ua i le Lauga, o e na latou sofa’ia pa puipei o Peteleema, ina ia maua le vai na momo’o i ai le tupu o Tavita. Na mae’a le toe sauniga ona molimoli atu lea o lona sāl i le fanua maliu i Mangere Cemetery e lagomau ai. Na ta’ita’iina e le susuga Dr. Peniamina Leota FS, faamavae ma faamanuia le malaga i le Pese 268, ‘*Talofa, uso e, tofaina oe! Ua sau le itupo e malolo, E ala oe pe a mavae le po, Tofa, tofa, tofa.*’ O le faato’ā toe maliu lea o se faifeau galue i le Ofisa Tutotonu, talu mai le susuga Faieseia Liu FS o le Matagaluega A’oa’oga Kerisiano i le tausaga 2011. Ia faamaise le Atua i le Faletua ma Aiga, faapea le Ekalesia faanoanoa. *F.Sulu*

Tuāutu Saumālū Vaō AF

(8/9/1958 – 28/11/2020) 62+2+21

Na soifua mai le Susuga i le A’oa’o Fesoasoani i le Aso Gafua, 8 Setema 1958 ae na valaau le Atua ma faamānava ana feau i le Aso Toona’i, 28 Novema 2020 ina ua 62 tausaga o le soifua. O ona toe sauniga sa faia lava i le malumalu o lana Ekalesia sa soifua mai ai ma tautua ai, le EFKS Lauili. O le Susuga i le Faafeagaiga ia Sepi Gafa FS (Solosolo) na ta’ita’i, o le Faafeagaiga ia Irenio Tagaloa FS (Eva) sa tatalo, ae o le Faafeagaiga ia Tanoalei’a Tunupopo FS (Leusoalii) sa saunoa i le upu faamafanafana i lea aso. O a’u na faaulufaleina i totonu o le falesa lona sāl mo ona toe sauniga ma faia lona molimau i lana tautua i le Ekalesia. O le molimau a le Tinā ia Lusi Maposua Vaō, e lē se tagata malos i lona fanau mai, ae sa finau lava ma maua ona faailoga i le matātā o le inisia i masini mamafa ma le uelo, ma avea ai o ia

ma se Faia’oga i lea matātā i le A’oga o Matātā Esee, seia oo ina nofo mo le tausiga o ona matua ma lona aiga. E taga tutusa le molimau a le tinā ma le molimau a le Faletua o le A’oa’o ia Auafa Tuāutu i ona vaivaiga i le ‘ava malos. Peitai na saunoa le Taitaifono o le Komiti a le Au-Toeaina ia Asotasi Gu Time FT, e ui e ‘ōnā le A’oa’o ae na te molimau sa aogā ia te ia, ona o le vai sa saunia e le A’oa’o Fesoasoani ia Tuāutu ua manuia ai o ia mai gasegase sa feagai ai, o le agaga faafetai lea o le Susuga i le Toeaina i le susuga i le A’oa’o Fesoasoani ua valaauina e le Atua. Sa faafetaia foi e le Susuga i le Aoao Fesoasoani ia Tuautu Kalepo AF i lona foi sa’i i lo la toalua ai i le tausiga o lo latou aiga i Lauili nei. Na faapea foi ona saunoa le Afioga i le Sa’o Faapito ia Leniu, ma ta’ua ai ona aogā ma lana tautua ai i le nuu, ao avea o ia o le Failautusi i le nuu. Sa ia ta’ua o se tagata e tautala sa’o, e lē ‘alo upu e lē faauiuiuiina foi e lea tagata se mea leaga e tatau ona fa’aali atu. Sa fa’aautū la’u molimau i le upu a Iosua o loo i le Iosua 1: 10 – 11: “¹⁰Ona fai atu ai lea o Iosua i le au faipule o le nuu, o loo faapea atu, ¹¹Ia outou feoi i le toagālauapi, ma fai atu i le nuu, ia faapea atu, **Ina sauniuni ia o a outou oso**, auā e toe aso tolu ona outou sopoia atu ai lea o Ioritana nei, ma o atu e fai mo outou le nuu ua foaiina mai e le Alii lo outou Atua ia te outou e fai mo outou.” Sa faamamafaina lava le upu lea - **ina sauniuni ia o a outou oso** - auā o le malaga i le nuu folafolaina, e faamoemoe le ulufale i ai i ‘ō, i mea e tapena atu iinei.

Na ma’ua taunuu mai i le galuega ia Iuni 2005, o fai Tuautu Saumālū ma taitai i le Autalavou, peitai o le Filifiliga i le Aso Sa 31/7/2005, na tuueseina ai mai le ekalesia ina ua fai lona toalua faapouliuli ae le’i tatalaina le faaipoipoga. Peitai na faaipoipo ma lona faletua ia Auafa i le aso 22/01/2007, na ausaili i le amataga o lea tausaga ma faaofia ai i le ekalesia i le aso 29/04/2007. Na fai ma Tiakono i le aso 6/5/2007 ae na su’e i le su’ega A’oa’o Fesoasoani i le tausaga e 2013 ma amata ai lona tofi ma la’ua galuega faa-A’oa’o Fesoasoani i le 2014, ae na maua lona Tusi Faamaonia i le 2016, ma galue mai ai lea i le tofi seia oo ina valaau le Atua. O lana lea tapenaga ma lona oso i le ulufale atu i le Malo o le Atua. O a’u foi na ta’ita’i i ona toe sauniga i luga o le tuugamau ma matou faatofa atu ai i le pese faatofa a le au Kerisiano. Manuia le malaga, le uso ia Keriso.

Saunia: Pita Toleafoa FS, EFKS Lauili, Matagaluega APIA SASA’E.

TUA'IMALO PAPALIITELE
PISIMAKA LEOTA TOOMATA
(20/12/1939 – 3/12/2018) 78+11+14

O le Tamā Tiakono, na soifua mai i le Aso Lulu, 20 Tesema 1939, ae valaau e lona Matai i le Aso Gafua, 3 Tesema 2018. O ona matua o Leota Toomata Papalii Pisimaka ma Eti Sooalo Leota Papalii. E to'atolu ona uso ae to'afitu ona tuafafine. Sa faaipoipo atu ia Solialofi Saia Enesi Tupai o Tuanai ma e to'avalu o laua alo. O le aofa'i o i latou na tutupu mai i le tamā e 34. O se tamā e faagalo gatā i le loto faapea mea fai a lenei Ekalesia, e ui i lona soifua matua ae taulamua i mea fai a le Ekalesia. O se tasi o sui o le aulotu na latou fa'ao'o atu lo latou filifilia o i maua e fai ma latou faifeau. Sa tusi aao i ai le Ekalesia e fai ma o matou Ta'ita'ifono, sa avea foi ma Failautusi faapea le tofiga Teutupe, ma e silia i le 30 tausaga o tautua i ia tofi o le Ekalesia. Sa fai foi o ia ma Ta'ita'ifono o le Aufaipese. Ao sauni fonotaga a le Aulotu, e muamua talanoa mai ia te a'u i soo se mataupu i so'u manatu, ma e na te lagolagoina so'u manatu vaivai. E tele ni gasegase faigatā sa pō'ia ai o ia, peitai o se tagata e taligasegase. E lē taofia ai ona tiute faatamā i totonu o lo latou aiga aemaise le aiga potopoto, e molimau uma lona aiga i le osi aiga o le tamā, e iloa foi i le to'atele o ē sa auai i lona aso fiafia. O Tuaimalo e fiafia tele i taaloga e auai ai tama fanau a lo tatou atunuu, ae faatitino lava i le taaloga soka o loo fiafia i ai tupulaga a lo matou nuu. O se tamā e lagolago i le galuega a le faifeau ma lona to'alua. E galulue lelei ma faamalosi i le aulotu i le galuega. E alofa ma mata'u i le Atua, e toaga i le lotu i Aso Sa, faato'ā lē vaia le tamā i le lotu pe a malaga pe gasegase foi. E ui i se manatu tatou te mafuta pea, ae faia lava le finagalo paia o lo tatou Atua. Sa o matou lolotu faatasi ma le tamā i le Aso Sa i le Maota maliu o Letoa Sefo Pa'u, ma sa maua ai le avanoa o le aulotu e molimau ai i le tamā. A o lona sauniga mulimuli sa faia lava i le malumalu EFKS Matautu-uta. Sa ou ta'ita'i ma fai lona molimau faa-le-agaga faapea le upu faamafanafana. O le A'oa'o ia Faasootauloa Roma AF na aumaia lona sa i totonu ma faitau le Tusi Paia. A o le Tiakono Katoliko ia Maselino na saunia talosaga. Sa molimau lona tuafafine o Papaliiitele Violet Papalii Richmond, Leota Toomata Chester Bentley, Tuaimalo Ah Samu sui o Aiga, Nancy Faapusi Papalii sui o le fanau, ma le faletua ia Solialofi Tuaimalo Papalii Pisimaka. Sa faai'u le sauniga i lona oliolisaga tumau ma faatofa ai

i le pese faatofa a le Au Faatuatua. Amuia lea auauna pe a sau lona Alii e maua mai o ia o loo faapea ona fai. Manuia lau malaga Tuaimalo.

Saunia: Elisaia Fiu Kolia FS, EFKS Matautu-uta. Matagaluega APIA.

SESILIA TUA'IMALO
MANIVAGAIA
(24/8/1945 – 27/10/2018) 73+2+4

O le Tiakono Tinā o la matou Aulotu i Matautu-Uta (Apia). Na fanau mai i le Aso Farai, 24 Aokuso 1945, ae valaau e lona Matai i le Aso Toona'i, 27 Oketopa 2018. Sa faaipoipo atu ia Vagaia Tuaimalo Mani, ma e sefulutasi o laua alo e aofia ai ma fanau muamua a le tamā, ae sa fai uma lava e le tinā. E toa 50 i latou na tutupu mai i le tinā. O se tinā e alofa i le aufaigaluega faifeau, e tausi faifeau, o le a se mea sili na te maua e molimoli mai lava mo maua ma le fanau. E to'afilemu ma tausaaia ona uiga, e lē lagona sona leo i mea fai a le Ekalesia, ae fai mea fiafia ma galue malosi. O le a se fiangalo e tasi i ai le aulotu, o lona finagalo foi lea. E pele ia te ia lana fanau e oo lava i fanau uma a le aulotu, e naunau ma e faamalosi i le fanau a'oga mo so latou lumanai manuia. Sa tele foi se fautuaga faatagata matua mo maua i le galuega a o fou mai i le galuega. Sa umi se taimi na feagai ai le tinā ma gasegase o le tino, e ui i le tiga o ma'i ae lē vaia sona mafatia. O lona taimi mulimuli sa matou fai lotu ai ma le fanau, ao usuina le pese 138 "E lou tama e, ua faafetai, ua sili lou alofa mai" Na tuua filemu ai e le tinā le soifuaga nei ae toe foi atu i aao mafanafana o lo tatou Matai sili i le lagi. Amuia le tagata faatuatua e valaau lona Matai a o loo galue pea. "Ua ou tau le taua lelei, ua iu ia te au le tausinioga, ua ou taofi i le faatuatua." Sa tumutumu lona sauniga faaleaiga a o lona sauniga mulimuli sa ou ta'ita'i ma faia lona molimau faa-le-agaga. Sa saunia e le susuga i le A'oa'o Fesoasoani ia Faasootauloa Roma talosaga, a o le Tiakono Katoliko ia Maselino sa faitauina le Tusi Paia ma saunia le feau faamafanafana. Na faaii ona sauniga uma i lona oliolisaga tumau ma faatofa ai i le faamaise a le au Kerisiano, "Talofa uso e".

Manuia lau malaga Sesilia Tuaimalo Mani Vagaia.

Saunia: Elisaia Fiu Kolia FS, EFKS Matautu-uta. Matagaluega APIA.

TUPUIMATAGI ETEREI
LAUANO FAASO'OTAULOA
NIFAE IEFATA NIMO ROMA
(12/6/1952 - 12/11/2020) 68+5+1

Na soifua mai i le Aso Tofi, 12 Iuni 1952 ae faamanavaina ana galuega i le Aso Tofi, 12 Novema 2020. O le faletua o le A'oa'o Fesoasoani ia Faaso'otauloa Roma. O lona tamā o Lauano Nifae Laulu o Faala Palauli ma Vaisaulu Lalomalava a o lona tinā o Sinatanitani Lauano Alatina o Patamea. Sa faaiipoipo i le Aso Lulu, 9 Aperila 1980; e to'alua o la alo, ae to'avalu fanau a fanau. O se tinā amio lelei ma tausafia i le matou mafutaga faale-ekalesia. O ia o le Teutupe a le Mafutaga a Tinā, a oo ina ta'ita'i i lotu a tinā e lava tapena ma saunia lelei. O se faamalosia i le galuega, o ana galuega foi e faalia ai lona faatuatua i le Atua. O le tinā e to'atele le aufaigaluega Faifeau latou te iloa, auā sa faigaluega i le Hardware a le Bluebird. Sa fesoasoani foi i le mamalu o le atunuu sa autovaa atu mo latou galuega fai. O se tinā e faamaoni ma galuega malosi i ona tiute fa'ale-lotu. E lei faataotolia le tinā i se ma'i, auā sa faigauega lava i le aso ma valaau ai lona Matai. Na manava atu lava i lana galuega ma fai i le tamā ua ese lana faalogo. Na tili atu i le falemai ma ua siliga taliiseu se fesoasoani.

Sa ou ta'ita'i i lona sauniga faaleaiga i le fale maliu o Ligaliga, a o ona toe sauniga sa faia i le falesa EFKS Matautu-uta. Sa ou ta'ita'i ma faia le molimau faaleagaga, na molimoli mai lona Sa e Faasalafa Alaovae (FS), tatalo na saunia e Alo Pita Mamea (FS), faitau le Tusi Paia e Lealaiauloto Tavita (AF) ao le upu faamafanafana na saunia e Keneti Leupepe (FS). Sa molimau le tamā o le aiga, o lona tuagane o Semau Iosua, faapea le sui o le mafutaga Tinā. Sa faaii ona toe sauniga i lona oliolisaga tumau i lo la maota i Tanoalei'a, ma faatofa ai i le pese faatofa a le Ekalesia.

“Amuia lea auuana, ua maua mai e lona Matai o loo faapea ona fai”

Manuia lau malaga Tupuimatagi Eterei Roma.

Saunia:

Elisaia Fiu Kolia (FS),

Matautu-uta , Apia

Matagaluega APIA.

TALATUPE IUPATI
LIUSAFUNE VAIGALEPA
FILIPO AINUU
(17/6/1942 - 14/11/2020) 78+4+29

O le Tinā Tiakono o le Ekalesia Faapotopotoga Kerisiano Samoa i Matautu-uta (Apia). O le afafine o le Faifeau Samoa o Iupati Iupati ma le faletua ia Faasalusalu Iupati sa galulue i Faala Palauli i Faasaleleaga.

Na soifua mai i le Aso Lulu, 17 Iuni 1942 ae faamanava e le Atua ana galuega i le Aso Toonai, 14 Novema 2020. Na faaiipoipo atu ia Liusafune Vaigalepa Filipino Sapapalii i le Aso Toonai 20 Iuni 1981. Ma te taunuu mai i le galuega i Matautu-uta ua valaau le Atua i le tamā. O Talatupe o se tinā e alofa i le galuega, e moni lona soifua faatuatua i le Atua. E le lagona lona leo i fonotaga a le Ekalesia, a o le mea lava e au tasi ai finagalo, e i ai foi lana lagolago. E faamaopopo i mea fai a le Lotu ae maise i le Mafutaga a Tinā ma le teuina o le falesā i Aso Sa e teu falesā ai. O taimi o a'u asiasiga e umi ai se taimi e talatalanoa ai ma le tinā, e fiafia e galue ma o mea sili foi na te maua e faapolopolo ma molimoli i le faifeau. E le'i faataotolia le tinā i sona gasegase tigāina, ae sa o lava e fai ana siaki masani i le falemai, na le oo mai ai i le lotu i le lua masina talu ai. O le po na valaau ai lona Matai, sa talatalanoa fiafia ma le fanau, ma malolo ai loa i lea po. O se tinā ua leva na sauni e feiloai i lona Matai. O ona toe sauniga sa faia lava i le malumalu EFKS i Matautu-uta. Sa ou ta'ita'i ma fai le tatalo ae maise lona molimau faaleagaga. Na molimau le fanau faapea le sui o le Mafutaga a Tinā. O le Susuga ia Alo Pita Mamea (FS) na faitauina le Tusi Paia ma saunia le upu faamafanafana, ona faai'u lea i lona oliolisaga tumau i lona maota i Matautu-uta lava. O le Pese faatofa a le Au Faatuatua na faamavae atu ai i le tinā ao malaga atu i lona aiga i le Lagi.

“O lo'u ola ua ia Keriso lea, ao lo'u oti o lo'u manuia lea.”

Manuia lau malaga Talatupe.


Saunia:

Elisaia Fiu Kolia (FS), Matautu-uta (Apia)

Matagaluega APIA.

O Ē UA FAI I LAGI FOLAUGA

SAMATA IUSITINI LEILOA FS



SESILIA TUAIMALO M. VAGAIA